



Communicaziun a las medias

Berna ils 24 d'october 2022

Ignazio Cassis retschaiva las Regenzas chantunalas dal Tessin e dal Grischun a Berna

Il president da la Confederaziun Ignazio Cassis ha beneventà oz ils cusseglers guvernativs dal Grischun e dal Tessin a Berna per in inscunter trilateral en il rom dal dialog politic regular cun ils dus chantuns da la Svizra taliana e rumantscha. Tranter ils temas da discussiun èn stads la guerra en l'Ucraina e sias consequenzas per la Svizra, las relaziuns transcunfinalas, la politica europeica e la promoziun da la plurilinguitad.

Dapi sia elecziun en il Cussegl federal maina il president da la Confederaziun Ignazio Cassis in dialog politic regular cun las Regenzas chantunalas dal Tessin e dal Grischun sco er cun las represchentantas ed ils represchentants da la Svizra taliana en las Chombras federalas. Dus onns suenter l'ultim inscunter trilateral a Bellinzona ha il schef dal Departament federal d'affars exteriurs (DFAE) beneventà las duas Regenzas chantunalas a Berna. L'inscunter è stà ina chaschun per sa barattar davart temas d'interess cuminaivel e per trair ina emprima bilantscha da l'onn presidial che Ignazio Cassis ha mess sut l'ensaina da la diversitad e che l'ha manà pliras giadas en il Tessin ed en il Grischun. La Conferenza davart la reconstrucziun da l'Ucraina che ha gè lieu l'entschatta da fanadur a Lugano ed ha per exempel rendì pli enconuschenta la Svizra taliana sin plaun internaziunal. Auters eveniments centrals èn stads la Conferenza annuala da las ambassaduras e dals ambassadurs a Puntraschigna, la sesida dal Cussegl federal «extra muros» en la Val Müstair ed il viadi annual dal Cussegl federal en il Tessin.

La plurilinguitad e la promoziun da las minoritads èn vegnidas tematisadas sut differents aspects. Il president da la Confederaziun ha accentuà l'engaschi dal DFAE per ina represchentaziun equilibrada da las differentas cuminanzeas linguisticas en l'administraziun federala sco er en las interpresas semistatalas ed ha suttastritgà l'impurtanza d'iniziativas sco il «Piccolo Erasmus». Quest project, ch'è vegnì lantschà

l'onn passà, promova il barat tranter las collavuraturas ed ils collavuratur da las administraziuns chantunalas tessinaisa e grischuna ed il persunal dal DFAE. L'abiltad da tgirar in dialog ed ina convivenza paschaivla tranter diversas cuminanzas linguisticas vegn percepida a l'exteriur sco ina caratteristica da la Svizra. Er per quest motiv s'engascha il DFAE vinavant a favur d'iniziativas che rendan pli visiblas las minoritads sur ils cunfins dal pajais or, sco per exempel la «Settimana della lingua italiana nel mondo» – apaina ida a fin – u la «Emna rumantscha» che vegn, suenter il success da las emprimas duas ediziuns, organisada er l'onn proxim en collavuraziun cun il chantun Grischun. Il settember passà è il president da la Confederaziun ultra da quai sa participà a l'occorrenza ch'è vegnida salvada a New Work a chaschun dal 30avel anniversari da la Decleraziun da la ONU davart ils dretgs da las minoritads.

Relaziuns transcunfinalas, relaziuns cun la UE e crisa d'energia en il center

Plinavant èn vegnids tractads temas actuals sco la guerra en l'Ucraina e sias consequenzas per la Svizra, per exempel en il sectur da la migraziun u da l'energia. Il president da la Confederaziun Ignazio Cassis ha punctuà quant impurtant ch'i saja che la Confederaziun, ils chantuns e las interpresas da la branscha collavurian e prendian cuminaivlamain las mesiras necessarias per garantir la segirezza da provediment, per crear reservas, per reducir la dependenza da gas e da petroli e per rinforzar las energias regenerablas naziunalas. El ha ultra quai stimà ils sforzs dals chantuns per retschaiver las fugitivas ed ils fugitivs ucranais e per integrar ils uffants e giuvenils en las scolas.

Silsuenter èn vegnidas discutadas las relaziuns cun l'Italia. Il president da la Confederaziun ha suttastritgà l'impurtanza da las relaziuns transcunfinalas sco er la rolla dals chantuns en il rom dals rapports cun ils stadis vischins. Las relaziuns cun Roma èn anc adina bunas ed ils dus pajais lavuran ensemen vi da dossiers averts, tranter auter vi dal process da ratificaziun da l'accord davart l'imposiziun da taglia da las cunfinarias e dals cunfinaris. La visita uffiziala prevista dal president da la Republica taliana Sergio Mattarella en Svizra è ina chaschun per approfondar meglier las diversas tematicas transcunfinalas ch'èn d'interess per la Confederaziun e per ils chantuns. Concernent la politica europeica ha il president da la Confederaziun explitgà l'intenziun dal Cussegl federal da cuntinuar cun la via bilaterala ed ha infurmà las duas Regenzas chantunalas davart il stadi actual dals discurs da sondagi cun la UE.

Adressa per dumondas:

Communicaziun DFAE
Chasa federala vest
CH – 3003 Berna
Tel.: +41 58 460 55 55
E-Mail: kommunikation@eda.admin.ch
Twitter: @EDA_DFAE